



Pravilnik o Izborima
Islamske zajednice Bošnjaka u
Švedskoj Džemat Stockholm

Org. Nr. 802017- 6882

Na osnovu člana 35. Statuta Islamske zajednice Bošnjaka u Švedskoj – Džemat Stockholm, Skupština Džemata na svojoj sjednici od 28. 11. 2020. godine donijela je

PRAVILNIK

o izborima

I. OPĆE ODREDBE

Član 1.

(Svrha)

Ovim Pravilnikom u skladu sa Statutom Džemata reguliše se proces izbora članova u organe i komisije Džemata i zastupnike u Skupštini IZBuŠ-a (u daljem tekstu Tijela). Pravilnik, također, pojašnjava opće statutarne odredbe o "Izbornom sistemu", te određuje izborne detalje koji nisu obuhvaćeni Statutom.

Član 2.

(Definicije tijela i mandata)

(1) Pravilnikom se uređuje način izbora u sljedeća tijela:

(a) Stalne organe Džemata

- Džematski odbor
- Nadzorni odbor
- Izborna komisija

(b) Stalne komisije Džemata

- Statutarna komisija
- Komisija za ženski aktivizam
- Komisija za vakuf

(c) Zastupnike u Skupštini IZBuŠ-a

(2) Članovi koji se biraju u tijela definisana u stavu (1) ovog člana mogu biti birani na puni mandat, dopunski mandat ili skraćeni mandat.

- Puni mandat traje četiri godine.
- Dopunski mandat traje onoliko koliko traje mandat člana čije je mjesto upražnjeno.
- Skraćeni mandat traje dvije godine i na njega se biraju zamjenici.

Član 3.

(Redovni izbori)

(1) Redovni izbori održavaju se svake druge godine u januaru mjesecu.

(2) Na redovnim izborima polovina članova svakog tijela Džemata bira se na puni mandat i na taj način svake dvije godine organe i komisije sačinjava pola „starih“ i pola „novih“ članova te se tako ostvaruje kontinuitet rada istih.

Primjer: U Džematski odbor je na prvim izborima izabrano 7 članova: imam, 3 člana na četiri godine i 3 člana na dvije godine. Na drugim izborima za dvije godine biraju se 3 nova člana na mandat od četiri godine i tako redom.

(4) Ukoliko se na redovnim izborima biraju i dopunski članovi onda se na ta mjesta biraju kandidati s najvećim brojem osvojenih glasova poslije izabranih kandidata sa punim mandatom.

Primjer: Potrebno je izabrati 3 nova člana s punim mandatom, i jednog dopunskog člana koji se bira umjesto člana koji je imao mandat još dvije godine. U tom slučaju prva tri kandidata sa najvećim brojem glasova su izabrani na puni mandat, a četvrti kandidat po broju glasova je izabran kao dopunski član na mandat od dvije godine.

(5) Zamjenici članova biraju se svake druge godine. To su po automatizmu kandidati s najvećim brojem glasova poslije kandidata s punim i dopunskim mandatom.

Primjer: Potrebno je izabrati 3 nova člana s punim mandatom, jednog dopunskog člana, te dva zamjenika. U tom slučaju prva četiri kandidata sa najvećim brojem glasova se biraju na puni i dopunski mandat, dok se peti kandidat bira kao prvi zamjenik, a šesti kao drugi zamjenik.

(6) Na prvim izborima u neko tijelo Džemata „prva polovina“ članova bira se na puni mandat, a „druga polovina“ na skraćeni mandat. Kandidati sa najvećim brojem osvojenih glasova ulaze u „prvu polovinu“. Ukoliko se u neko tijelo bira neparan broj članova onda u „prvu polovinu“ ulazi jedan kandidat više.

Primjer: Ukoliko se u Nadzorni odbor bira 3 člana, onda se 2 kandidata s najvećim brojem glasova biraju na mandat od četiri godine, a 1 kandidat na mandat od dvije godine.

(7) Zastupnici u Skupštinu IZBuŠ-a biraju se uvijek na puni mandat. Naš Džemat, na osnovu broja članova, ima četiri zastupnika od kojih se tri biraju, a četvrti je prvi imam po položaju. Ukoliko postoji normativna prepreka zbog koje izabrani delegat u toku svog mandata izgubi zastupničko mjesto, onda njegovo mjesto u Skupštini IZBuŠa dobiva sljedeći kandidat sa liste, po broju glasova.

Ukoliko postoji normativna prepreka zbog koje prvi imam u toku svog mandata izgubi zastupničko mjesto, onda njegovo mjesto preuzima drugi imam.

Član 4.

(Dopunski izbori)

(1) Dopunski izbori održavaju se po potrebi, shodno odredbama Statuta i ovog Pravilnika.

(2) Dopunski izbori se moraju provesti ako se broj članova u nekom tijelu Džemata smanji za više od 50%.

(3) Dopunski izbori će se održati u sklopu redovnih izbora ukoliko su redovni izbori već raspisani u trenutku ukazivanja potrebe za dopunskim izborima.

(4) Mandat člana izabranog na dopunskim izborima traje onoliko vremena koliko traje mandat člana na čije je mjesto izabran.

Član 5.

(Raspisivanje izbora)

(1) Odluku o raspisivanju izbora donosi Džematski odbor, na prijedlog Izborne komisije. U odluci o raspisivanju izbora treba navesti tijela za koja se provode izbori, broj članova koji se bira, datum, te dinamiku izbora.

(2) Izbore iz stava (1) organizira i sprovodi Izborna komisija Džemata u skladu s ovim Pravilnikom.

Član 6. (Glasanje)

(1) Aktivno biračko pravo (pravo glasa) u Džematu ima svaki njegov član koji je navršio osamnaest godina.

(2) Aktivno biračko pravo utvrđuje se na osnovu liste članova koji plaćaju članarinu putem poreza, odnosno članova koji su potpisali plaćanje članarine putem poreza do 31. oktobra prethodne godine.

(3) Na izborima se glasa tajno putem glasačkih listića. Nije moguće glasati javno, elektronskim putem ili za nekog drugog putem punomoći.

II. IZBORNA PROCEDURA

Član 7. (Rokovi)

(1) Izborna komisija, najmanje na 90 dana prije izbora, objavljuje rokove za pojedine radnje u izbornom postupku kao i način prijavljivanja kandidature.

(2) Prilikom određivanja rokova Izborna komisija će voditi računa da se ostavi rok od najmanje 30 dana za prijave kandidata, kao i da lista kandidata bude dostupna članovima Džemata najmanje 15 dana prije izbora.

Član 8. (Prijava kandidature)

Prijava kandidature se vrši Izornoj komisiji pismeno na obrascu koji se objavljuje uz odluku o raspisivanju izbora.

Član 9. (Odluka o kandidaturi)

(1) Izborna komisija razmatra sve pravovremeno pristigle kandidature.

(2) Komisija će pismeno obavijestiti kandidate o prihvatanju ili eventualnom neprihvatanju njihove kandidature.

(3) Neprihvaćena kandidatura će biti obrazložena. Po potrebi Komisija može pozvati kandidata i obaviti razgovor.

(4) Izborna Komisija dužna je odbiti kandidaturu lica za koja se utvrdi da ne ispunjava uvjete za izbor.

Član 10.

(Žalba)

(1) Žalbu na odluku Izborne komisije o neprihvatanju kandidature kandidat može podnijeti u roku od 48 sati od dostave.

(2) Žalba se dostavlja elektronski.

(3) Izborna komisija razmatra žalbu i donosi konačnu odluku, a potom informiše dotičnog kandidata.

Član 11.

(Biračka lista)

(1) Izborna komisija pismeno objavljuje biračke liste na zaštićenom dijelu džematske internet stranice i oglasnoj tabli u prostorijama Džemata ili na neki drugi primjeren način. Ova objava mora sadržati sljedeće:

1. kratak sažetak procesa do sastavljanja biračkih listi,
2. broj članova i eventualnih zamjenika u svakom tijelu Džemata odnosno broj zastupnika u Skupštinu IZBuŠ-a,
3. listu članova svakog tijela koji ostaju na funkciji (kojima mandat još nije istekao),
4. listu članova svakog tijela koji su iz različitih razloga napustili svoje funkcije i na čije se mjesto biraju dopunski članovi,
5. listu kandidata za izbore u svakom tijelu (Na biračku listu kandidati se unose prema abecednom redu prezimena pa imena.),
6. broj članova koji su prijavili svoju kandidaturu, ali koji nisu ušli na biračke liste.

Član 12.

(Rezultati)

(1) Konačne rezultate izbora utvrđuje Izborna komisija direktno poslije izbora, a poslije provedene procedure objavljivanja izbornih rezultata (član 21.) iste objavljuje u pisanoj formi.

(2) Izborna komisija će u roku od 3 dana od dana održavanja izbora napraviti Izvještaj te dostaviti isti Džematskom odboru na arhiviranje, te redovnoj Skupštini kao informaciju.

Član 13.

(Preuzimanje funkcije)

(1) Izabrani kandidati na redovnim izborima preuzimaju svoje funkcije od prve naredne redovne Skupštine na kojoj se i rezultat izbora protokoliše.

(2) Izabrani kandidati na dopunskim izborima preuzimaju svoje funkcije od momenta objavljivanja izbornih rezultata (član 21.). Rezultat izbora se protokoliše na prvoj Skupštini.

III. KANDIDATURE

Član 14.

(Kandidiranje)

(1) Kandidature se dostavljaju Izornoj komisiji. Kandidatura se podnosi na propisanom obrascu.

(2) Džemat zahtijeva aktivan Džematski odbor. Stoga je važno da se Odbor sastoji od članova koji žele, mogu i imaju vremena za rad u realizovanju ciljeva Džemata. Biti član Džematskog odbora podrazumijeva veliku odgovornost. Džematski odbor u svom radu uvijek gleda naprijed i teži ka stalnom poboljšanju i razvoju Džemata, boljoj radnoj sredini te dugoročno stabilnoj ekonomiji.

(3) Izborna komisija će u saradnji sa Džematskim odborom organizovati predizborni sastanak prijavljenih kandidata sa članstvom. Na ovom sastanku kandidati će se moći predstaviti članstvu, a i prisutni članovi mogu uputiti pitanja vezana za kandidaturu.

Član 15.

(Pravo na kandidaturu - pasivno biračko pravo)

(1) Pravo na kandidaturu u bilo koje tijelo ima član Džemata koji:

1. je registrovan za plaćanje članarine putem poreza najmanje tri godine u kontinuitetu,
2. nije uposlen u Džematu. Uposlenim u Džematu smatra se osoba koja ima godišnja primanja u iznosu koji prelazi pola "prisbasbelopp".
3. nije bio član tijela za koji se kandiduje dva uzastopna puna mandata. Član može biti biran najviše dva uzastopna puna mandata u isto tijelo, nakon čega mora pauzirati najmanje jedan puni mandat.
4. govori bosanski jezik,
5. nije u ličnom bankrotu i nema zabranu obavljanja djelatnosti,
6. u zadnje 4 godine nema izrečenu neku od težih sankcija definisanih Pravilnikom o disciplinskim mjerama.

(2) Pravo na kandidaturu u stalne organe Džemata ima član Džemata koji:

1. ispunjava uvjete iz stava (1) ovog člana,
2. nema bliže rodbinske ili bračne veze sa članovima stalnih organa Džemata. Pod bliže rodbinske veze ubrajaju se djeca, roditelji, brat i sestra kandidata.

Primjer 1: Kandidat se kandiduje kao član Džematskog odbora, a njegova supruga je član Nadzornog odbora i bit će i dalje nakon izbora. U ovom slučaju kandidat se ne može kandidovati.

Primjer 2: Kandidat se kandiduje kao član Džematskog odbora, a njegova supruga se istovremeno kandidira kao član Nadzornog odbora. U ovom slučaju neko od njih mora povući svoju kandidaturu.

(3) Pravo na kandidaturu u Izbornu komisiju Džemata ima član Džemata koji:

1. ispunjava uvjete iz stava (1) ovog člana,
2. nije bio član Komisije jedan puni mandat. Član može biti biran najviše na jedan puni mandat u Izbornu komisiju, nakon čega mora pauzirati najmanje dvije godine.

- (4) Pravo na kandidaturu za zastupnika u Skupštini IZBuŠ-a ima član Džemata koji:
1. ispunjava uvjete iz stava (1) ovog člana,
 2. nije član ili zamjenik Izvršnog odbora IZBuŠ-a.

Član 16.

(Broj kandidata)

(1) Minimalan broj kandidata za jedno tijelo mora biti veći od broja kandidata koji se bira u to tijelo.

Primjer: Potrebno je u Nadzorni odbor izabrati jednog člana i jednog zamjenika. U ovom slučaju na listi za glasanje mora biti najmanje tri kandidata.

(2) Izborna komisija će stimulisati prijavljivanje i biranje predstavnika oba spola.

(3) U slučaju da u jednom tijelu Džemata svi izabrani članovi budu predstavnici istog spola onda se kao zamjenici u to tijelo biraju predstavnici drugog spola i to bez obzira na broj osvojenih glasova. Ukoliko na izornoj listi kandidata za to tijelo nema predstavnika drugog spola onda se izbor zamjenika bira po rezultatima glasanja bez obzira na spol.

Član 17.

(Dopuna kandidata)

(1) Ukoliko se u propisanom roku za prijavu kandidata prijavi minimalan broj kandidata, ali svi prijavljeni kandidati za jedno tijelo su istog spola, Izborna komisija će aktivno tražiti minimalno jednog kandidata suprotnog spola za prijavu kandidature.

(2) Ukoliko se u propisanom roku za prijavu kandidata prijavi minimalan broj kandidata, ali među prijavljenim kandidatima za jedno tijelo nema kandidata ispod 25 godina, Izborna komisija će aktivno tražiti minimalno jednog kandidata koji je ispod 25 godina za prijavu kandidature.

(3) Ukoliko se u propisanom roku za prijavu kandidata nije prijavio minimalan broj kandidata, Izborna komisija će aktivno tražiti kandidate za prijavu kandidature. Prilikom traženja kandidata voditi će računa o sljedećim kriterijima:

1. zastupljenost oba spola,
2. kandidati ispod 25 godina,
3. iskustvo kandidata potrebno za tijela za koja se vrši izbor.

IV. GLASANJE

Član 18.

(Opis procedure glasanja)

(1) Na dan zakazanih izbora izborna mjesto se otvara u 9:00, a zatvara u 19:00 sati.

(2) Izborna komisija pojašnjava pravila izbora.

(3) Kandidati za svako tijelo nalaze se na odvojenim izbornim listama i sa vidnim brojem kandidata koji se biraju u to tijelo.

- (4) Svaka izborna lista ima posebnu glasačku kutiju. Glasачke kutije su od providnog materijala.
- (5) Maksimalan broj kandidata koji se zaokružuje na izbornim listama utvrđuje se zbirom broja kandidata koji se bira na puni i dopunski mandat. Broj kandidata koji se bira na skraćeni mandat se ne računa.
- (6) Glasачki listić je važeći ukoliko se zaokruži jedan ili više kandidata, ali maksimalno onoliko koliko se bira u to tijelo.
- (7) Glasачki listić je nevažeći ukoliko se zaokruži veći broj kandidata nego što se bira u to tijelo.
- (8) Glasачki listić je nevažeći ukoliko je na njemu vršeno bilo kakvo prepravljavanje, dopisivanje ili potpisivanje.
- (9) Svaki kandidat koji je na nekoj od izbornih listi može posmatrati proceduru glasanja.

Član 19.

(Glasanje)

- (1) Glasач uzima glasačke listiće i zaokružuje redni broj ispred prezimena kandidata koje on želi.
- (2) Glasач dolazi do Izborne komisije koja utvrđuje njegovo pravo glasanja na izborima.
- (3) Poslije utvrđenog prava glasanja glasač ubacuje glasačke listiće u glasačke kutije, a Izborna komisija evidentira da je dotični glasač glasao.

Član 20.

(Brojanje glasova)

- (1) Odmah po zatvaranju glasačkog mjesta, Izborna komisija se povlači u posebnu prostoriju i broji glasove za svako tijelo.
- (2) Svaki kandidat koji je bio na nekoj od izbornih listi može, kao posmatrač, prisustvovati brojanju glasova.
- (3) Nakon prebrojanih glasova Izborna komisija sačinjava pismeni Izvještaj rezultata glasanja.
- (4) Prebrojani glasački listići se sa Izvještajem potpisanim od članova Izborne komisije predaju Džematskom odboru na arhiviranje u roku od 24 sata od završetka glasanja.

Član 21.

(Objavljivanje izbornih rezultata)

- (1) Izborna komisija saopštava izborne rezultate samo izabranim kandidatima i utvrđuje njihovo prihvatanje mandata.
- (2) Ukoliko neki kandidat ne prihvati mandat onda se uzima sljedeći kandidat po broju glasova iza prvobitno izabranih kandidata saopštenih u stavu 1. ovog člana.
- (3) Ukoliko kandidati imaju isti broj glasova izabran je onaj koji je stariji po godinama.
- (4) Izborna komisija objavljuje izborne rezultate.

Član 22.

(Stupanje na snagu)

Ovaj Pravilnik, kao i izmjena ili dopuna ovog Pravilnika, stupa na snagu od narednog dana od dana njegovog usvajanja.

Član 23.

(Datum usvajanja)

Ovaj Pravilnik usvojen je na Skupštini Džemata, održanoj dana 28. 11. 2020. godine.

Stockholm, 28. 11. 2020. godine

Predsjedavajući Radnog predsjedništva
Mustafa Šetkić

